


Jesse Salinas | Ua Tus Tuam Choj



Coj caw ntsib Jesse Salinas, tus Thawj Tswj rau kev Pov Npav *Chief Elections official* rau Yolo County tam li ib tug tswj hwm kev saib xyuas *assessor*, tug teev ntaub ntauv *clerk-recorder* thiab tus tso npe rau kev pov npav *registrar of voters*. Tsis tas li no, nws kuj pab coj lub koos haum Yolo County Youth Civic Initiative ([YCYCI](#)), muaj kev koom tes nrog lub hauv paus teev kev kawm *County Office of Education*, ua los txhawb cov hluas txoj kev xav thiab nkag siab txog kev koom tes rau tej zog. Nod yog nws zaj DabNeeg *StoryEngine*.

“Peb yuav tsum muaj cov thawj coj uas muaj lub zeem muag los pab ua tus tuam choj rau ntau lub zej zog, los sib koom tsim kho txhawb yam uas peb muaj. Peb yuav tsum tau txhawb nqa cov uas muaj peev xwm sawv los coj kev li no thiaj li muaj lub hww tsam yuav ua tau tiav.” - Jesse Salinas

Tsim Kho Lub Hom Phiaj

Kuv zaj dab neeg pib thaum xyoo xya caum, nyob rov rau hauv Oakland. Peb yog ib tse neeg muaj tsib leeg uas sib txiv nyob rau ib lub tsev ti ti uas ntsawm nkaus ob chav pw. Muaj ntau yam xwm txheej tshwm sim rau lub caij ntawd hauv Oakland. Lub sij hawm ntawd muaj ntau yam xwm txheej xws li qhov Black Panther movement thiab qhov teeb meem uas Patricia Hearst raug ntes losis nyiag nyob rau xyoo 1974. Tam li ib tug hluas loj hlob rau thaum ntawd, nws tsis txaus ntseeg tias tej no tshwm sim rau peb lub zej zog. Nws yog tej teeb meem uas txaus ntshai kawg rau kuv thiab kuv tsev neeg. Tej teeb meem

uas txaus ntshai no tau tshwm sim kiag ntawm peb tej tog vaj tog tsev thiab kuv nco ntsoov ib zaug uas tau tshwm sim kiag ntawm peb tau rooj thaum kuv muaj cuaj xyoos.

Kuv txiv tau los tsev lig lig ib hmos tsaus ntuj uas kuv hnov ib lub suab qw nrov li ntawm 9 mus 10 feet ze rau ntawm kuv lub rooj txag. Kuv ncav taub hau mus saib thaum lub qhov rooj qhib plho ua rau kuv pom kuv niam raug khuj thiab kuv txiv tab tom raug plaub tug txiv neej muab ntaus thiab khuj rau ntawm peb qab tsib taug. Lawd ntaus kuv txiv thiab muab phom tau rau ntawm nws taub hau. Tam li ib tug me nyuam cuaj xyoos, yus tsuas xav tias yuav pom tej no hauv yeej yaj kiab xwb, tiamsis yeej tsis xav ib zaug tias yuav los mus tshwm sim kiag rau yus thiab yus tsev neeg zaum ntawd.

Zaum ntawd yog ib zaug uas lim hiam heev ua rau peb ras dheev txog tej kev phem uas tau tshwm sim rau ntawm peb tau rooj. Peb muaj hmoo uas kuv niam thiab txiv kuj muaj txoj sia nyob dhau zaum ntawd. Qhov uas tau pom yus niam tus yus hlub tshaj plaws raug lawd muab ntaus, thiab pom yus txiv raug lawd muab tsim txom ua dog dig tseem tau phom nti rau nws taub hau thaum lawd los muab nws puav, yam no yog ib qho zaim muag txaus ntshai tshaj plaws uas tsis muaj leej twg xav pom txog thaum tsim dheev ib tag hmos los.

Vim qhov teeb meem ntawd tau tshwm sim, kuv txiv thiaj li txiav txim siab tias peb tsev neeg yuav tsum tau khiav tawm hauv lub nroog Oakland. Peb khiav mus rau Fremont. Kuv txoj kev nyob tau hloov lawm ntau uas yog los ntawm ib thaj chaw muaj ntau haiv neeg nyob sib xyaw hauv Oakland mus rau thaj chaw uas txawv hlo zoo li Fremont.

Nyob rau hauv Fremont, tej poj niam uas taug kev ib puag ncig yus mas tuav lawd lub hnab ruaj li ruaj thaum lawd pom yus dhau kev xav tias ntshe yus yuav nyiag vim hais tias yus yog neeg nqaij tawv txawv thiab yus taug kev los txawv lawd. Lub neej nyob rau hauv Oakland ua rau kuv pom tias kev nyuaj siab tsis tau xaus, kuv tseem yuav ntsib ib txoj kev nyuaj siab uas txawv dua thaud.

Kev Kawm Los Tsav Txoj Hauv Kev

Kuv los ntawm ib lub tsev kawm ntawv uas kuv kawm tau A xwb thiab tseem yog tus president rau chav ntawd. Thaum kuv hloov los rau Fremont, lawd muab kuv coj mus tso rau cov college prep class tas nrho tsuas tshuav chav English lus Aaskiv xwb. Lawd ntsia kuv cev nqaij daim tawv ces cia li txiav txim tias ntshe kuv yuav tsis txawj lus Aaskiv meej vim kuv tsis zoo li lwmm tus tub ntxhais kawm ntawv uas nyob hauv lawd lub tsev kawm. Kuv xav mus kawm kom tau ib lub tsev kawm qib siab uas yog UC (University of California). Kuv thiaj tau hais rau kuv tug counselor pab cov tub ntxhais tias kom nws muab ib lub sij hawm rau kuv ua kom tau zoo rau kuv chav Aaskiv es nce tau siab thiab ua tau pov thawj tias kuv yeej keej, nws yuav luag tsis kam tiamsis kuj lam cia ua li hais lawm thiab. Muaj ib Hnub nyob rau hauv kuv chav ntawv, kuv pom ib tug tub kawm tuaj sab teb chaws Switzerland uas kawm ntawv tau zoo heev. Kuv noog nws kom muab tswv yim rau kuv tias yuav ua li cas thiaj li zoo li nws. Nws siv sij hawm li plaub teev los mus cob qhia kuv. Kuv li ntawv kuj nce ntawm C mus rau tus A thaj

tsam li ib lub hlis ntawd xwb, uas kuv rais hlo los ntawm ib tug lawd pom tias tsis tau ntawv mus rau ib tug uas tsis dog dig, kuv kuj tseem yog ib tug uas keej dua cov thiab.

Txoj kev yuav mus tau rau lub tsev kawm qib siab UC uas kuv ntshaw, kuv yuav tsum tau kawm community college uake nrog rau lub sij hawm uas kuv tab tom kawm high school thiab. Tiamsis tus principal thawj tswj tsev kawm tsis kam pub lub hwv tsam ntawd rau kuv. Kuv tug counselor thiaj li kom kuv mus ncaj qha rau tug thawj tswj loj ntawm hauv paus tsev kawm uas yog superintendent, ces kuv tus tij laug thiaj li tau tsav tsheb rau wb mus cuag nws. Thaum kuv mus txog, tus Superintendent tseem tsis tau xyeej, ces kuv thiaj li mus nrhiav tau tus lwm tswj uas yog tus assistant superintendent, nws yog ib tug txiv neej Dub uas txawv hlo lwm tus. Nws hais rau kuv tias, “Nws yeej tsis lam muaj cuab kav yuav los txwv txiav koj lub neej yav pem suab li ntawd,” ces nws thiaj li tau muab txoj kev tso cai rau kuv.

Qhov no yog kuv lub neej kev taug rau thaum hluas. Thaum kuv nto kiag 18 xyoo, kuv nkag siab tias kev kawm tseem ceeb npaum li cas, piav qhov tseeb rau tib neeg paub, thiab muab lub hwv tsam rau txhua tus kom muaj kev los mus muaj yeej li qhov kuv twb tau muaj los.

Los Tsim Tsa kev Tuam Choj

Kuv kuj mus kawm ntawv qib siab rau UC Santa Cruz mus kawm computer science vim kuv txiv tau hais rau kuv tias computer yuav yog peb lub neej rau yav tom ntej. Kuv yog ib ntawm tsawg tsawg leej tib neeg nqaij tawv tsis yog dawb uas tau mus kawm rau sab computer science no.

Lub caij uas kuv tseem kawm ntawv qib siab, kuv ua hauj lwm rau EOPSAA, *the Equal Opportunity Program Student Affirmative Action*. Lub koos haum no cia kuv tawm mus koom nrog rau tej zej zog sab nraud thiab mus cog kev phooj ywg. Kuv thiaj li tawm tau ib lub tswv yim hais tias xav tsim kom tau tus tuam choj los tuam rau hauv plawv coj ntau pab pawg haiv neeg txawv los mus sib koom uake- xws li Black Student Union, the Asian American Student Alliance organization, and MEChA. Kuv xav kom peb muaj ib lub koob tsheej coj los cog kev lom zem thiab sib tham. Peb kuj tau tsim ib lub multicultural dance qhib kev seev cev rau ntau haiv neeg pab pawg uas lom zem heev. Peb sawv daws kuj tau los tawm ib lub hom phiaj los tsim kom tau ib yam cia uas yog- ib qho kev kawm uas yuav tsum tau kawm txog lwm haiv neeg pab pawg coj los rau lub tsev qib siab kom txhua tus yuav tsum tau kawm ua ntej lav ntawv. Qhov kev uas tsim tsa tau li no nrog ntau pab pawg los sib koom yog ib qho uas ua rau kuv zoo siab heev tau los nrog lawd tsim tau lub hom phiaj no tiav hlo.

Tom qab kuv lav ntawv thiab tau paub txog cov cai kev kawm nyob rau *[state] Capitol*, kuv kuj hloov los mus khiav num rau sab *nonprofit* lossis ua hauj lwm pub dawb rau lub zej zog. Kuv ua hauj lwm li ntawd tau yim lub xyoos ua ntej rov qab los ua num rau tsoom fww hauv zos *local government*. Vim li no, kuv thiaj li tau los mus ua hauj lwm rau Yolo County, uas kuv nyob tau tshaj 25 lub xyoos no.

Kuv txoj hauv kev pib txij thaum yau los uas kuv pom tias kev sib ntaus sib tua tsis sib haum muaj feem cuam tshuam tau tib neeg lub neej, thiab yog vim li cas thiaj li muaj tej kev cov nyom txaus ntshai li no,

uas ua tau rau muaj kev phom sij thiab tab kaum tib neeg lub neej heev. Qhov yuav pab tau tib neeg uas niaj hnuv nyob lub neej li ntawd, mas yuav tsum tsim tsa kom tau tus choj los tuam txoj kev uas tu ncuu los mus noog thiab txhawb lawd kom muaj hwv tsam los txo tej kev txwv lawd es lawd thiaj li yuav caum cuag tej hom phiaj.

Kuv pom tau tias kuv tus kheej lub luag hauj lwm yog los nrhiav kev cob qhia tib neeg, txo tej kev xav uas txwv lawd, thiab pab lawd los mus muaj kev sib koom kom muaj kev ruaj siab rau lawd lub neej.

Tam li tus *Chief Elections official* uas tswj thiab saib xyuas kev xaiv tsa nom tswv thiab kev pov npav, kuv yeej niaj hnuv pom tias muaj xov xwm thiab lus paj lus cua uas tsis tseeb. Tej lus uas hais tawm los cob qhia yog tseem tsis meej thiab tsis tseeb ces tseem phom sij tshaj. Yog rov muab xav txog qhov xwm txheej uas tau tshwm sim nyob rau lub Ib Hlis Ntuj Hnuv Tim 6, uas txaus tu siab kawg qhov tib neeg cia li mus tsoo thiab nkag mus rau peb lub teb chaws lub tsev Capital. Yam tau tshwm sim ntawd yuav tsum muab thim xav tias txaus chim npaum cas, thiab kev mus caij tsuj tawm tsam li ntawd yuav zoo dab tsi thiab rhuav peb npaum li cas rau peb lub teb chaws txoj kev ywj pheej.

Peb yuav tsum pab cob qhia kom tib neeg kawm los mloog ntau sab kom paub meej thiab tseeb es tsis yog hnov ib tug hais ces yuav li ntawd. Peb yuav tsum xyaum qhib siab mus mloog txog lwm tus txoj kev ntseeg thiab lawd pom muaj li cas es txawm ua rau peb tsis kaj siab los yog ib txoj kev zoo rau peb pom txoj hauv kev dav los ntawm ntau leej.

Kuv xav txog cov hluas uas tau ntaus kuv niam thiab txiv yav tas thiab pom tau tias lawd tau xaiv ib txoj hauv kev uas tsis zoo rau lawd.

Peb yuav ua li cas thiaj los nthuav tau lus cob qhia kom txhawb siab rau tib neeg kom lawd nkag siab tias muaj lwm txoj hauv kev los tsim tsa thiab hloov peb lub teb lub chaw kom tiaj tug thiab muaj kev sib hlub tshaj qub? Kuv tsis quav ntsej tias koj txoj kev ntseeg rau sab nom tswv yog tog twg. Peb txhua tus nyias yeej muaj nyias txoj kev nyuaj siab. Peb yuav ua li cas thiaj li tuam tau ib tug choj los coj peb ua ke kom txhob muaj kev tu ncuu?

Ruaj Khov Rau Txoj Kev Ntseeg thiab Tsev Neeg

Kuv niam tu kuv loj hlob los tuav txoj kev ntseeg. Nws tseem ceeb heev rau kuv lub neej, thiab coj tau kuv kev kom nco ntsoov txog yam tseem ceeb es los tsim kho qee yam uas kuv kho tau rau txoj kev zoo.

Kuv nyiam nrog kuv tsev neeg thiab nrog kuv cov me nyuam. Cov neeg yus hlub ces yeej yuav tshwj xeeb rau yus. Rov mus taug kuv tej lw thiab rov ntsib kuv tsev neeg txheeb ze yog yam ua rau kuv muaj kev zoo siab thiab kev kaj siab. Tiamsis tej thaum, lub caij uas kuv muaj kev kaj siab tshaj yog thaum kuv thov Vajtswv rau tej thaj chaw ntsiag to uas kuv mloog tau Vajtswv txoj lus.

Kuv muaj hmoo kawg uas tau los muaj txoj hauj lwm zoo thiab muaj ntau lub hwv tsam, tiamsis nws yeej tsis yooj yim ib txwm li no. Tib neeg tsis nkag siab txog tej xwm txheej ntau yam uas kuv tau hla dhau thiab tsis pom yam kev nyuaj siab kuv raug. Ntau zaus heev los lawm uas kuv yog tus kawg nkaus tsaus ntuj nti es xauv qhov rooj tag rau ntawm tej chaw ua num mam li yog tus lawv qab los tsev. Kuv twb muaj tsib caug tawm xyoo lawm kuv thiaj li mam txog kuv lub hom phiaj rau txoj hauj lwm no thiab txoj hauv kev no yog ib txoj deb deb kawg nkaus li thiaj mam cuag.

Thaum kuv raug xaiv los nyob sawv kuv qhov chaw tuav teg dej num no, kuv ntseeg tsis tau. Kuv raug xaiv tsa los ntawm 70% kev xaiv pov rau kuv- qhov no ua rau kuv zoo siab tias lawd pom kuv lub dag zog lawm thiab. Kuv txaus siab hais tias tib neeg los kuj muaj kev zoo siab rau tag nrho cov dej num uas tau khiav los mus tsim hloov ntau yam.

Kuv hais rau cov Thawj Coj uas Xaiv Tsa *Board of Supervisors* tias yog lawd xaiv kuv ces lawd yeej yuav cog tau kev ntseeg siab rau kuv. Kuv ntseeg tau tias lub luag hauj lwm no kuv yeej ua tau zoo heev los ntawm 5 lub xyoos uas kuv tau ua hauj lwm rau hauv. Kuv txaus siab thiab ruaj siab heev rau pab pawg tub ntxhais ua hauj lwm uas kuv yuav tau los mus coj thiab saib xyuas. Kuv los zoo siab heev uas kuv muaj ib pab tub ntxhais ua hauj lwm uas yog los ntawm ntau caj ceg thiab txawv haiv uas coj tau ntau lub peev xwm txuj ci. Kuv pom tau lawd sawv daws mob siab rau lawd lub luag hauj lwm heev.

Yog koj hais rau kuv tias muaj ib hnub kuv yuav raug xaiv tsa los nyob rau lub rooj no, kuv yuav tsis ntseeg. Hmo kuv cov me nyuam hu tuaj qhuas kuv nyob rau hmo xaiv tsa thawj coj, nrog rau kuv tus poj niam uas tau nrog nraim kuv los lawm 35 lub xyoos- yog yam uas zoo tshaj plaws hauv kuv lub neej. Lub sij hawm ntawd yog ib lub uas tuav tag nrho txhua yam tau tshwm sim hauv kuv lub neej los thiaj li muaj lub sij hawm ntawd.

Txoj Kev Cia Siab thiab Lub Neej Yav Pem Suab Rau Central Valley

Central Valley rau kuv mas yog sab greater Sacramento los dhau plaws rau Fresno. Nyob rau haud, peb muaj cov chaw uas nyob deb nroog uas ntsiag to los mus rau tej nroog loj, thiab tseem muaj tej nroog uas lom zem heev. Sacramento County yog thaj chaw uas muaj neeg txawv haiv thiab ntau pab pawg tshaj plaws dua li tag nrho United States. Muaj ntau caj ceg los ntawm ntau haiv neeg nyob sib xyaw hauv Sacramento County thiab Sacramento City. Kuv los kuj yog ib tug uas tawg hlaw hauv Sacramento thiab. Kuv thawj thawj txoj hauj lwm thaum kuv lav ntawv yog nrog *California School Boards Association* hauv West Sacramento, ces kuv mus ua hauj lwm rau tod *Capitol*.

Kuv pom tias Central valley tseem muaj chaw yuav hlaw ntxiv tuaj. Muaj ntau yam tseem yuav tshwm sim tau. Yam uas yuav los tsim thiab qhib kev hlaw yog los ntawm kev koom tes thiab lub hwj chim sib txhawb ntawm cov pej xeeb sawv daws. Zoo xws li thaum Cesar Chavez coj caw tau ib pab pawg sawv los tawm suab thiab tsis tas li ntawd kuj tshuav Dr. Martin Luther King, Jr. thiab. Cov no yog cov

thawj coj uas twb tho tau txoj kev rau peb lawm, peb twb sawv tau rau lawd lub xub pwg lawm. Cov thawj coj no twb txua tau kev, peb lub luag hauj lwm ces yog kom peb txhob hnov qab es kom tsim kho txuas ntxiv mus.

Peb yeej hloov tau Central Valley los mus ciaj vaj, tiamsis peb yuav tsum muaj cov thawj coj uas muaj lub zeem muag los pab ua tus tuam choj rau ntau lub zej zog, los sib koom tsim kho txhawb yam uas peb muaj. Peb yuav tsum tau txhawb nqa cov uas muaj peev xwm sawv los coj kev li no thiaj li muaj lub hwv tsam yuav ua tau tiav. Peb yuav tsum muaj kev sib koom thiab kev pom zoo mas thiaj li muaj kev hloov. Thiab peb yuav tsum lees txais thiab qhib siab los sib noog thiab tham txog tej yam uas nyuaj rau peb sawv daws vim cov lus tham no yog cov uas yuav tuam tau tus choj rau peb sawv daws los sib ntsib thiab los sib koom.

Lub koos haum Yolo County Youth Civic Initiative (YCYCI) tab tom tsim ib qhov qauv txheej txheem los cob qhia cov hluas txog txoj kev tseem ceeb ntawm kev pov npav thiab yuav ua li cas los mus tawm suab sib cog tswv yim rau lub zej zog. Kuv pom tias yam no yog ib yam uas yuav muaj loj zuj zus coj los cob qhia rau cov hluas yav tom ntej.

Kuv xav txog ib tug phooj ywg uas tau loj hlob rau sab Central Valley ntawm lub nroog Hanford. Nws tau pab tsim ntau yam rau hauv UC Merced, ces tauj mus rau nws txoj kev kawm rau nws daim PhD tom Stanford thiab tau dhau los ua *Fresno State's chancellor*. Tamsim no nws yog thawj thawj tug *Chancellor* ntawm *CSU system* uas yog haiv neeg *Latino*. Nws loj hlob hauv Hanford uas yog nws lub vaj lub tsev.

Nws tsis tseem ceeb tias koj yog haiv neeg thiab pab pawg twg, yam tseem ceeb yog los ntawm koj pluaj siab thiab lub zog los khiav num tuav txoj kev mob siab thiab ua zoo li zoo tau ntawm koj tus kheej lub peev xwm. Qhov no yog ib yam uas kuv xav muab coj los piav tham txhua zaus kom neeg paub. Yog peb tsim kho tau ib txoj kev uas pab txhawb tau tib neeg, peb yuav pab tau lawd lub neej thiab lawd kuj ho pab tau lub zej zog mus lawm yav tod.